

天

史

天史卷之二

明青都鍾羽正龍淵

兩先生誦選

雲間董其昌思白

東武後學丁耀亢野鶴甫輯著

淫十九案

楚平王納婦鞭屍

平王楚靈王子名齋疾其在蔡也即陽封人之女奔之生子建王使伍奢費無極爲之師如秦爲太子建娶婦婦好未至無極曰秦女好可自娶之爲太子更

求婦。平王乃自娶秦女。無極得罪太子。因怨伍奢。乃
讒之王曰。自無極入秦女。太子怨。皆伍奢教之。奢有
二子。他日助太子。不能無望於王。王囚伍奢。欲召其
二子誅之。奢之子伍尚至。伍員不至。奢曰。員不至。楚
其盱食乎。楚遂殺伍奢及尚。員走於吳。爲吳行人。平
王死。昭王元年。員帥吳王闔廬。與唐蔡俱伐楚。昭王
出奔。員掘平王之墓。鞭其尸。闔廬盡妻其後宮。吳士
大夫盡妻其士大夫之妻。三旬而後去。

論曰。棄疾以亂立。以淫亡。而不免鞭屍之禍。無極逢

惡工讒卒亦不免於誅天道明威各以類應可不畏哉

吳王闔廬淫楚後宮

吳王闔廬弑王僚而自立，從伍員之謀，大敗楚師，五戰而入郢，以班處宮。三旬而秦救至，越句踐聞吳之在楚，亦起兵伐吳。吳遂引兵還。吳十一年，闔廬帥師伐越，勾踐禦之，陳於檣李，大敗之，使死士以戈擊闔廬，傷將指，取其一履而還。闔廬遂歿於軍，命其子夫差曰：爾勿忘勾踐殺爾父乎？三年，乃報越。

論曰：怨毒之與人甚矣哉！以淫報淫，以暴易暴，吳楚之怨，淡而越得制其瑕，螳螂相角，無已時也。後吳越

構兵而楚乃稱霸

齊襄公內亂

春秋齊襄公，僖公子也。女弟爲魯桓公夫人。公內姦焉。旣嫁，夫人與桓公數如齊。襄公亂不止。桓公知之，怒夫人。襄公使力士彭生拉殺桓公於車上。魯人以爲讓，公乃殺彭生，爲魯除醜焉。是年冬十有二月，襄公獵沛丘，見彘，從者曰：「彭生也。」公怒射之。彘人立而啼。公懼，墜車，傷足，失屨，歸而爲無知所裁。

論曰：春秋記桓公十七年，公與夫人姜氏遂如齊，因會樂而入齊，故曰「遂」。誌不謹也。桓之歿，其在敝笱時。

平齊襄內亂禽行既無人道。至魯莊忘仇縱母。復有
於師於防於穀之會。春秋特書不一而足。戒亂倫也。
追彭生現孺身弑而嗣殘。則禮之於人國也大矣。

魯莊公割臂私盟

魯桓公爲彭生殺於齊。公子同立，爲魯莊公。母夫人以殺桓公故，留齊不敢歸。莊公復娶齊女哀姜爲夫人。娣曰叔姜，從生子開。哀姜無子，三十二年，莊公臺上見孟女而悅之，割臂而盟，許立爲夫人。生子班。公愛孟女，欲立班爲太子。問弟叔牙，叔牙欲立公弟慶父。問弟季友，季友請立班。公遂使人酖殺叔牙而立班。莊公卒，慶父與哀姜私通，欲立叔姜子開，使圉人犂殺公子班於党氏。初，班亦嘗與犂爭戲，梁氏女有怨。

故及之。班歿，子開立，是爲湣公。慶父與哀姜通，益甚，乃謀殺其子湣公而立慶父。魯人怒，欲誅慶父。慶父奔莒，遂自殺。時齊桓公稱霸，聞哀姜亂魯，召而殺之，以屍歸魯。

論曰：余按魯世家，蓋三世淫報矣。魯惠公妾生子息，是爲隱公。爲公子時，娶於宋，女至而美，惠公奪以爲夫人，生子允。惠公卒，聽公子揮之讒，允弑隱公而自立，是爲魯桓公。桓公娶齊女，齊襄公淫之，公爲彭生所殺，一報也。桓公生子同，是爲莊公。公夫人哀姜淫。

於慶父殺公子班而立慶父。二報也。莊公割臂私孟氏女。生班。班亦與圉爭梁氏女而爲所殺。三報也。雖天之禍淫。歷歷不爽。而淫氣所結。綿汙數世。或亦家法乎哉。貽厥孫謀。可不慎歟。

衛宣公奪婦

衛宣公蒸於夷姜。生太子伋伋。伋伋娶齊女美。未入室。宣公詭而納之。更爲太子娶婦。宣公得齊女。生子壽。子朔自以其奪太子妻也。常心惡而欲廢之。予太子以白旄。使於齊。而令盜遮殺白旄者。且行。子朔之兄壽知其謀。不忍。謂太子曰。界盜見太子白旄。欲殺。可毋行。太子曰。逆父命求生。不可。遂行。壽見太子不止。盜白旄先往。以代太子歟。盜見白旄。果殺之。壽歟。而太子伋後至。謂盜曰。所當殺乃我也。盜并殺太子。以報。

宣公宣公立朔爲太子。國人不平。逐朔而立伋弟黔牟。衛終亡。

論曰。禍有慘於自殺其子者哉。殺一子而二子爭。姦焉。謂非天平。宣公殺伋。非殺子也。姦奪妻也。壽代伋。姦非報兄也。仇亂母也。禍以姦成。倫以淫滅。天之巧報也。亦嚴且當矣。新臺之詩。所以悲有泚乎。當與平王鞭尸之報。參觀。

明皇納壽王妃致禍

唐玄宗開元二十三年，冊壽王妃楊氏。壽王瑁，玄宗第十八子也。天寶四年，玄宗注意後宮，無當意者，或言壽王妃楊氏之美，帝見而悅之，令妃自以其意乞爲女官，號太真，潛內宮中，寵遇異常，宮中號曰娘子。凡儀體皆如皇后，更爲壽王娶郎將韋昭訓女。四年八月，遂以太真爲貴妃，贈其父楊玄琰兵部尚書，以從兄錡爲殿中少監，錡爲駙馬都尉，三姊皆賜第京師，奉朝請，封國夫人。從祖兄釗，善樗蒲，出入禁中，賜

金紫更名國忠爲司空領四十餘使貴震天下貴妃
寵冠後宮每乘馬則高力士執轡授鞭織繡之工專
供貴妃院者七百人妃欲得生荔枝歲命嶺南馳驛
飛送民間歌曰生男勿喜女勿悲君看女却爲門楣
貴妃寵胡人安祿山爲假子出入宮掖醜聞於外天
寶十五年安祿山反玄宗奔蜀楊貴妃及國忠等皆
伏誅于是盜賊蜂起屠滅郡縣不可勝計太子即位
於靈武唐室遂衰

論曰玄宗初政天下想望風采似亦有爲主也及後

杲杲日出爲月所食。而衆星宵亂矣。語云馬蹏躓車。
惡婦敗家床第之言。三世不安。明皇之謂矣。

三女滅密

國語曰。周共王游於涇上。密康公從。有三女奔之。其母曰。必致之於王。夫獸三爲羣。人三爲衆。女三爲粲。王田不取羣。公行下衆。王御不叅一族。夫粲美之勗也。衆以美物歸汝。而何德以堪之。王猶不堪。況爾小醜乎。小醜備物終必亡。康公久而不獻。一年。王滅密。論曰。女陰象也。女之美則陰叢矣。陰叢而陽消矣。治亂之所以生也。維國曰女戎。維家曰婦索。三女成姦。密母其知道歟。

齊懿公奪驂乘妻

懿公齊公子。商人弑其君舍而自立。其爲公子時。嘗與丙馱之父獵。爭怨。及卽位。斷丙馱父足。而使丙馱僕。閭職妻美。納之宮中。而使職驂乘。五月。公遊於申池。丙馱與職浴戲。職曰。斷足子。馱曰。奪妻者。兩人怨謀。遂弑懿公於竹中。

論曰。則其父而御其子。奪其妻而近其夫。欲不亡得乎。然商人弑君。有天道焉。不徒禍淫也。

陳靈公衷衣伏弩

春秋陳靈公與其大夫孔寧儀行父皆通於夏姬夏姬者陳大夫徵舒之母也靈公嘗衷夏姬之衣戲於朝大夫泄冶諫曰君臣淫亂民何効焉公不聽復殺泄冶十五年公與孔寧儀行父飲於夏姬家公戲二子曰徵舒似汝二子曰亦似公徵舒聞之怒伏弩廐門射殺靈公孔寧儀行父奔魯爲人所殺

論曰禮義廉耻國之四維四維不張國乃滅亡靈公衷衣而戲南冠卽淫君臣之大倫蔑矣單襄公所以

知其仁也。

齊莊公登臺被弑

莊公齊靈公子名光爲靈公所廢大夫崔杼迎而立之初棠公妻好崔杼取之莊公與之通數如崔杼家以崔杼之冠賜人崔杼怒嘗欲與晉合謀襲之不得間公筮宦者賈舉舉怨公遂爲崔杼間以報怨正月莒子朝齊公饗之崔杼稱病公問崔杼病遂從其妻妻與杼謀閉公不得出登臺而請解不許遂射殺之論曰齊太史書崔杼弑其君然則杼過乎哉曰此爲臣道訓也夫天道則直報之其使杼能弃妻而逃不

爲公臣則完矣。天豈無殺淫君之手哉。

周幽王一笑傾城

按周太史伯陽曰夏后氏之衰有二神龍止於帝庭自言曰余褒之二君夏帝卜之殺與去之皆不吉卜請其祭而藏之乃吉於是龍亡而祭在櫝焉及夏商傳此器不敢發至厲王之末發而觀之祭流於庭不能除使婦人裸而譟之祭爲玄黿入王後宮後宮之童妾遭之遂孕無夫而生子懼弃之於路及宣王時有童女謠曰檠弧箕服實亡周國宣王聞之適有賣是器者使執而戮之逃於道見鄉者後宮童妾所弃

妖女啼於路哀而收之亡奔於褒女長而美後褒人以有罪入其女於王以請贖以女子出於褒也故爲褒姒當幽王三年王之後宮見而愛之生子伯服竟廢申后及太子宜臼以褒姒爲后伯服爲太子褒姒不好笑周制爲烽燧大鼓有寇至則舉烽諸侯皆來援王欲褒姒笑乃大舉烽燧諸侯至而無寇褒姒遂大笑幽王悅之爲數舉烽火諸侯益亦不至有號石焚者佞巧善諛好利王用之爲卿幽王九年太子宜臼奔申王欲殺太子求之申侯弗與王伐之申侯乃

與鄩人召西夷犬戎共攻王。王舉烽。兵不至。遂殺幽王。驪山下。擄褒姒。盡取周賂而去。於是諸侯共立宜臼爲平王。東遷於維維維邑。周室遂微。

論曰。獠降於廷。夏書近怪。誠有之乎。厚積三代之淫氣。至周始發。毒焉。其天數耶。非也。褒姒不寵。老宮中耳。何能妖人。廢嫡立褒。而後淫氣得而報之矣。女戎何代無之。無如王之不御。何。吾不欲人之援詭怪以自解也。

晉厲公外嬖致禍

晉厲公多外嬖。鄆陵之勝，欲盡去羣大夫而立諸姬兄弟。寵姬兄曰胥童，嘗與卻至有怨，而嬖於厲公。嬖人夷陽五、長魚矯皆有寵於公。卻至與卻錡奪其田，咸怨之。欒書又怨卻至，不用也。欒書遂敗楚師，乘間使楚公子茂告公曰：「鄆陵之戰，實望召楚，欲作亂。」內子周立之。公告欒書，欒書曰：「其有焉。」試使卻至聘於周，欒書使周見之以實其言。公疑之，信焉。遂怨卻至。八月，厲公獵，與姬殺禽而飲，卻至以豕進，寺人奪之。卻至

射殺寺人。公怒曰：「季子欺余。」公將作難。胥童曰：「必先三卻族。大多怨。」公曰：「然。」胥童夷陽五以兵八百人襲殺三卻。又欲殺欒書，不果，遂使胥童爲卿。厲公遊嬖人匠驪氏之家，欒書中行偃襲捕厲公而弑之，葬之於翼東門之外，以車一乘。胥童等伏誅，迎立周爲悼公。至晉平公元年，亦盡滅欒書宗。

論曰：左傳卻至獻楚捷於周，驟稱其伐，單襄子曰：「溫季其亡乎？怨不在明，不見是圖。」是年而晉殺三卻，固不在美男破老之時，知有翼門之禍矣。偏聽成奸，故

龜不可煬也。

呂不韋嫪毐春申君

秦昭王四十二年，以其太子安國君之中男子楚質於趙。時秦攻邯鄲，于楚久趙，禮衰困乏，不得意。陽翟大賈呂不韋遊趙，見之曰：「此奇貨可居。」以五百金結楚歡，齎千金西入秦，爲之遊說。昔太子愛姬華陽夫人，無子，以不韋力得立，楚爲子。不韋取邯鄲歌姬，與居，有身。使子楚見而悅之，因釣奇以獻其姬。及期生子政。子楚以姬爲夫人，秦昭王五十年，子楚與不韋謀去趙，歸秦。昭王薨，太子安國君立，爲孝文王。子楚

爲太子。一年孝文王薨。子楚立。爲莊襄王。三年薨。太子政立。太子政者。不韋進姬所生子也。計二王共立四年薨。而及太子政。疑不韋有力焉。是爲始皇。始皇幼。以不韋爲相國。號仲父。進姬爲太后。太后與不韋私通。及始皇壯。太后淫不止。不韋乃私求大陰人。嫪毐者。爲魯人。以其陰關桐輪而行。以啗太后。拔鬚眉。納之宮中。爲宦者。日夜侍太后。與不韋淫亂。太后又有身焉。當是時。不韋家僮萬人。食客三千餘人。嫪毐家僮亦數千人。始皇九年。有人告嫪毐謀反。與太后

通事連相國呂不韋。於是秦王下吏治夷嫪三族。不韋飲醢而死。秦亦夷其族。先是楚有黃歇者。游學博聞。事楚頃襄王。有功。封於江東。爲春申君。能下士。食客歸珠履者三千人。楚王無子。歇私幸李園女。弟有身。進楚王。生男。立爲太子。王貴幸李女。李園用事。妬春申君。恐洩其謀。陰伏刺客於棘門之內。斬春申君。使吏滅其家。

論曰。不韋居人爲貨。借色穿窬。子母之術大矣哉。卒至器滿身滅。則亦亡其本矣。嫪毒拔鬣春申。進李。何

淫報之相踵也

楊貴妃兄姊驕淫

貴妃楊玄琰女也。開元初冊爲壽王妃。玄宗聞其美，納之宮中，號太真。遂以爲貴妃。妃肌肉凝膩，神彩光艷。帝寵昵之後，宮無與倫者。兄釗不學無行，素善樗蒲，能揣摩人意，上見而悅之，恩幸日隆。一歲遷十五使，帝更名曰國忠，位至司空，與弟錡、錡皆任近要。妃姊三人皆有才色，上呼之爲姨，出入宮掖，并承恩幸。封韓、虢、秦國夫人，賜第京師，極其壯麗。一堂之費動踰千萬。國忠與虢國夫人通往來無度，三夫人從幸。

華清皆會於國忠第。水陸珍羞數千盤。一盤費中人十家之產。或并轡走馬。不施帳幕。道路爲之掩目。凡楊氏五家。各爲一色衣。以自別。五家合隊。燦若雲錦。國忠仍以劍南節度使旌節引於前。車馬僕從充溢坊衢。錦繡珠玉鮮華奪目。國忠嘗謂人曰。吾本寒家。一旦緣椒房至此。未知稅駕之所。終不能致令名。不如且極樂耳。范陽節度使安祿山本以胡人爲上寵。貴妃悅而幸之。嘗以錦繡爲大襜褕。與之宮中。名爲貴妃洗兒。上賜金錢。厚命國忠。姊妹皆與祿山敘。

兄弟故祿山出入禁中。通宵不出。醜聞於外。遂致天寶之亂。天寶十四年。祿山反。帝出奔蜀。獨與貴妃姊妹皇子妃主及親近宦官宮女出延秋門。其皇孫妃主在外者皆委之而去。中外大擾。至咸陽。日中猶未得食。命軍士散詣村落求乞麥飯。諸妃主以手掬之。須臾而盡。夜半至金城縣。民逃。驛中無燈。帝與軍士相枕以臥。貴賤無復辨。明日至馬嵬驛。將士饑疲。日中無食。皆憤怒。以禍由國忠。遂於馬上殺之。及三國夫人以鎗揭其首。陳玄禮却帝縊貴妃於驛庭。楊氏

滅軍中皆呼萬歲。

論曰。蓋聞情者弱骨之媒。愛者醉心之藥。星眸粉黛。名爲伐性之斧斤。狐媚嬌癡。號作登床之機弩。況假合能得幾時。玉質朱顏。轉眼而雞皮。霍髮好醜。原同一味。金床象枕。回頭而骨冷魂銷。愚者沉焉。達者笑之。故琴瑟取諸關雎。樂而不淫。床第戒於牝雞。禮以坊。乃有唐關多穢。兆自開邦。兄收弟婦。有泰日角之雄。君子納父姬。忽代月升之女主。點籌借箸。投子聞聲。此皆歷代醜踪。續述祖武。亦不爽矣。逮至玄宗。

恣情漁色。納子婦而號太真。寵妃姊而封列土。華清
水。滑凝脂。流合歡之香。繡嶺塵飛。連騎貢側生之笑。
堂開錦繡。排甲第於雲霄。門列祭戟。擲泥沙於金玉。
或聯鑣。則雲錦迷天。或狎坐。而珠璣滿地。雕麟織鳳。
羅紈窮天女之工。玉鱗冰鱗。水陸盡窮民之血。以茲
淫風相煽。陰氣乘權。蛾眉嬌妹。鴛鴦入鵲。鴿之羣。碧
眼胡兒。虎豹結狐狸之黨。洗兒之金錢。一入。漁陽之
鼙鼓。忽來。鳳輦。雲奔。馬嵬。塵起。路傍。弃霓裳之寶器。
道隅。走乞食之王孫。遂使。螭頸。投繯。羊頭。貫槩。七夕。

秘約化爲冷煙。三峽淋鈴。魂消夜雨矣。不亦悲哉。然
後知玉碎香殘。前日之珠翠也。羯鼓征塵。前日之歌
舞也。手掬麥飯。前日之珍羞也。以鎗揭首。前日之劍
南旌節也。樂極而悲來。物窮而理返。是故君子土木
形骸。電光富貴。性不以情移。而識不以愛亂。蓋審於
濃澹久暫之間。不以彼易此也。

武三思穢亂唐宮

武三思者、武后之侄、則天初廢帝、欲傳位三思、狄仁
傑以姑侄子母孰親、遂不果、卒以三思爲內史、唐神
龍元年、張東之等舉兵討武氏之亂、二張旣誅、中宗
復位、以帝女安樂公主適三思子崇訓、宮人上官婕
妤黨於武氏、爲之先容、故復以三思爲司空、婕妤好辯
慧能文、與三思通、復薦之於韋后、帝嘗使后與三思
雙陸、爲之點籌、故三思得與后通、出入宮掖、武氏之
勢復振、遂封張東之等爲五王、而後殺之、以宗楚客

周利用等爲耳目。時人謂之五狗。景龍元年，太子重俊起兵攻三思，及其子崇訓皆死。景龍四年，韋后與上官婕妤爲臨淄王隆基所誅，復暴三思尸於市。論曰：中宗徇房陵之盟，復辟奉婦，已無陽綱矣。至於筐傾管覆而不能制，卒成其手，蓋陰孽爲疾，除之不足。唐室穢運未終耳。龍盡狗來，倏焉傾覆。語曰：寵臣不敝軒，信矣夫。

張昌宗兄弟伏誅

武后既亂唐爲周廢帝酖子。內行愈不正。張昌宗易之。皆年少美姿容。太平公主薦之入侍。皆爲武后所幸。常傅朱粉。衣錦繡。賞賜不可勝計。武承嗣三思宗楚客等皆候其門。爭執鞭撻。謂易之爲五郎。昌宗爲六郎。改控鶴監以易之爲奉宸令。每內殿曲宴。太后使衣羽衣吹笙。乘木雀於庭中。文士皆賦詩以美之。稱爲子晉後身。又曰蓮花似六郎。兄弟競尚豪奢。中外側目。弟昌儀爲洛陽令。請屬公行。有選人姓薛以

金五千兩賂之。昌儀以屬天官侍郎。後失其名。遂舉
在銓。姓薛者六十餘人。悉留注官。其權如此。嗣聖十
八年。封昌宗爵鄴國公。神龍元年。后不豫。張柬之舉
兵討亂。詣東宮迎太子。斬昌宗。易之於廡下。梟首藁
街。

論曰。明月作晝。衆星自出。陰氣淫賊。玄狐入室。汙泥
涅澤。妄擬蓮花。五王舉義。拔根抽芽。以丈夫之妾婦
事女子之官家。豈偶然哉。吁。嗟。兮。黃臺之瓜。

和士開佞寵

和士開爲齊黃門侍郎。以善握槊。彈琵琶。有寵於胡太后。出入臥內。齊主深委任之。與婁定遠等俱用事。時號八貴。太尉趙郡王高叡請出之。士開以美女珠簾。結定遠爲援。遂殺叡。以士開爲尚書令。與官婢陸令萱。穆提婆。相依附。爲之養子。威權日盛。朝士于進無恥者。呼爲假父。士開嘗傷寒。醫云當服黃龍湯。士開有難色。有候之者。請先嘗一飲。而盡其好佞如此。天元五年。琅邪王儼矯詔殺之。陸令萱。穆提婆爲周

所殺。

論曰。情之所不爲者。君子有以耻之。吮癰舐痔。嘗糞拂鬚。爲之甚。甘而當之。無愧何哉。曰。求富貴也。夫內爲人之養子。外必爲人之假父。譬如放債取償。以利牟利也。他日琅邪之誅。與竈俱焚。則獲罪於天耳。

丹陽太守妻徐氏報冤

獻帝時吳丹陽太守孫翊爲其督媽覽丞戴員所殺妻徐氏甚麗覽欲逼而納之徐給之曰乞須晦日設祭除服然後聽命潜使所親呼翊舊將孫高傅嬰等與共圖覽高嬰涕泣許諾密呼翊所恩養者二十餘人與盟殺覽及晦設祭徐氏哭泣盡哀畢乃服艷衣薰香沐浴言笑懽悅若得意者覽密覘之果不復疑因呼高嬰匿室中使人召覽入遂殺之卽率餘人就外殺員徐氏還衣縗經奉二人首以祭翊墓吳孫權

聞之震服。族誅覽負餘黨。擢高嬰二將爲牙門將軍。
論曰。士君子當途窮志變。賣君父以苟全者多矣。卽
能奮志以死。而博一節義之名。猶寥寥也。徐氏婦人
耳。全身而報仇。能不落人手而甘心焉。其智勇過人
遠矣。嗚呼。殺人而淫其室。天之所殛。徐氏殆憑之歟。

元順帝淫奢

元至正十三年，以哈麻爲右丞，哈麻姦邪傾巧，以淫術媚於上。有西番僧善行房中運氣之術，號演揲兒法。又有僧伽璘真，善秘密法，皆以淫戲爲樂。哈麻進之於上，上習之，嘗謂上曰：陛下尊富極矣，不過保有見世而已，人生幾何，當受此秘密，大喜樂禪定。於是元帝大悅，詔以西蕃僧爲司徒，伽璘真爲大元國師，各取良家美女奉之，謂之供養。帝日從事於其法，廣擇天下女子以求淫樂。君臣縱欲，男女裸處，羣僧出

入無禁。醜聲外聞。帝性巧。善剗製龍舟於內苑。長一百二十尺。行舟龍首尾眼爪皆動。游戲山海。於宮中晝夜不息。時中原大亂。天變屢作。龍鬬於樂滿江。天火燒萬餘人。天鼓鳴於絳州。空中有戰鬪聲。大都晝晦如夜者旬有五日。至正二十五年春日。傍有一月一星。山東赤氣千里。我

明太祖洪武起兵滁陽。所至皆款。元主北奔。遂以亡滅。

論曰。天寒冰霜。陽道閉藏。夷狄百年。盤據我邦。長夜

大明日月頓光。腥羶一掃。我武維揚。人紀天道。禮樂
孔彰。峻極於天。悠久無疆。

天史卷之三

明青都鍾羽正龍淵

兩先生評選

雲間董其昌思白

東武後學丁耀亢野鶴甫輯著

殘三十六案

蚩尤

蚩尤姜姓炎帝裔也。好兵喜亂。作刀戟大弩。以暴虐天下。兼并諸侯。貪欲無度。炎帝榆罔不能制。命居少顓。以臨西方。蚩尤益肆其虐。出炎水。登九淖。以攻少

帝於空桑炎帝避居涿鹿軒轅乃命師攻之戰於涿鹿之野蚩尤能作大霧軍士昏迷軒轅爲指南車以示四方遂擒蚩尤戮於中冀因名其地爲絕轡之野論曰嗟乎害氣伏陽天開殺伐疑戰萬年玄黃共血君子慎之於扶抑間矣

舜殛四凶

左傳太史克曰舜臣堯賓於四門流四凶族渾敦窮奇檮杌饕餮皆惡獸也能爲人害故天下之人目爲四凶殺諸四夷以禦魑魅故虞書曰賓於四門四門穆穆無凶人也堯七十有一載殛鯀於羽山放驩兜於崇山流共工於幽州竄三苗於三危四罪而天下咸服

論曰書契在唐虞者不可考已故四凶之惡無聞焉
目錄方命圯族治水績用弗成堯北狩罔上共工氏

觸天女媧補之。三苗遺種至今在。詎可盡信乎。姑闕而不論云。

桀紂

夏桀名癸貪狼無道能申句鐵負其材力不務德武傷百姓伐有施氏得妹喜而嬖之爲瓊室象廊瑤臺玉床行淫縱樂殺諫臣關龍逢召湯囚之夏臺湯修德諸侯皆歸率兵以伐桀桀走南巢放而殛湯乃踐天子位代夏以有天下國號商。

商傳二十有八主而生帝辛天下謂之紂紂資辨捷敏材力過人拒諫飾非愛妲己作新淫聲并里舞酒池肉林使男女保逐爲長夜之飲縱淫樂重刑辟百

姓。顓。頊。爲。炮。烙。之。刑。醢。九。侯。脯。鄂。侯。西。伯。聞。之。竊。歎。
并。囚。西。伯。賂。以。美。女。奇。貨。釋。婦。西。伯。陰。行。善。天。下。三。
分。有。其。二。以。服。事。殷。西。伯。卒。不。伐。紂。子。發。立。是。爲。武。
王。天。下。叛。殷。會。周。者。八。百。紂。又。淫。亂。不。止。殺。王。子。比。
干。剖。其。心。視。之。微。子。去。箕。子。佯。狂。爲。奴。民。爲。之。歌。曰。天。
曷。不。降。威。時。日。盍。喪。紂。聞。之。曰。我。生。不。有。命。在。天。乎。
暴。虐。滋。甚。武。王。乃。率。天。下。諸。侯。伐。紂。紂。發。兵。七。十。萬。
人。距。武。王。皆。倒。戈。反。開。周。二。月。甲。子。紂。走。鹿。臺。衣。珠。
玉。自。焚。死。

論曰。當桀之暴也。不知其有南巢也。湯放之。見天道焉。然遂以此主天下。君臣之間。一大變哉。而德盡數終。安得無鹿臺之子孫耶。武又步其後轍矣。得失之於子孫。何若券也。予歷數夏殷。惟周享年八百。孔子曰。文王可謂至德也已矣。吾從周。然而天道於此。淡焉矣。

秦始皇無道

秦始皇名政。秦莊襄之子。呂不韋之姬所生也。鷙鷹
豺聲。剛毅淡戾。初并天下。以咸陽不堪居。起七十餘
萬人。築阿房宮。連絡三百餘里。惡先王之道不便。用
李斯謀。焚書坑儒。鑄金人十二。聚天下之兵。築長城。
以避胡。遊四海。求不灰藥。頌功勒石。自以萬世有天
下也。二十六年。有使者夜行。過華陰。鬼遺使者璧曰。
爲我遺瀟池君。今年祖龍死。明年巡東海。至琅邪。西
至平原津。而病崩於沙丘。丞相斯恐變。爲置屍輶涼。

車中載鮑魚以亂其臭。通宦者趙高殺太子扶蘇而立二世。二世爲高所弑。傳位子嬰。項羽入咸陽。燒秦官闕。殺嬰亡秦。計十四年而國亡。

論曰。吾讀太史公秦本紀。乃知秦之惡積深矣。習戎狄之行。弃禮樂之化。自商君刻深至政而愈振焉。棄天滅人。古未有者。厥未寒而地分。至二世而督責愈力。欲不亡得乎。嗚呼。鬼物遺璧。賊臣滅宗。天之示報亦彰矣哉。

項羽烏江自刎

項羽名籍，楚將。項燕後，長八尺，力能扛鼎，才氣過人。秦亂，殺守令，起兵，立楚懷王。孫心爲義帝，暗啜叱咤，萬夫皆廢。所過城邑，無不屠滅。殺楚卿子冠軍宋義，坑秦降卒二十萬人於新安。西屠咸陽，殺秦降王子嬰，燒秦宮室，火三月不滅。收寶貨，婦女而東，自立爲西楚霸王。背約不王。漢徙義帝於長沙，陰使其將季布殺之。數敗漢，多殺傷。雖水爲之，不流。漢五年，圍羽垓下。兵散，漢皆楚歌。羽夜飲帳中，悲歌曰：力拔山兮。

氣蓋世。時不利兮。騅不逝。騅不逝兮。可奈何。虞兮。虞兮。奈若何。泣數行下。冒圍走。陷大澤中。東渡烏江。曰。天亡我也。無面目見江東父老。遂自刎。漢將王翳取其頭。餘騎蹂踐爭割。分其體爲五。項羽遂亡。

論曰。羽重瞳絕力。用兵若神。亦人傑哉。乃功成弑主。滅信好殺。欲以人力服天下。不亦悖乎。雖然。秦惡極矣。非羽不能報也。天生羽以報秦。復生漢以收羽。則羽之材亦天授也。然則君子當用天而不爲天所借。

齊湣王驕暴擡筋

齊湣王滅宋而驕，乃侵楚及三晉，欲并二周爲天子。狐咼正議，斲之檀衢。陳舉直言，殺之東閭。燕昭王日夜撫循其人，並以富實，乃謀伐齊。於是使樂毅約趙、魏、秦、連楚及魏，諸侯害齊王之驕暴，皆許之。燕悉起兵，使樂毅爲上將軍，并將秦、魏、韓、趙之師以伐齊。戰于濟西，齊師大敗，湣王出走，毅入臨菑，取寶物祭器，輸之於燕。燕王親至濟上，勞軍行賞，封毅爲昌國君，留衛齊城未下者，齊王之衛。衛君辟宮舍之，稱臣共

具王不遜。衛人侵之。去奔鄒魯。又有驕色。鄒魯不納。遂走莒。楚使淖齒將兵救齊。因爲齊相。楚欲與燕分齊地。乃執湣王而數之。曰。千乘博昌之間。方數百里。雨血沾衣。王知之乎。曰。知之。廩博之間。地坼及泉。王知之乎。曰。知之。有人當闕而哭者。求之不得。去則聞其聲。王知之乎。曰。知之。齒曰。雨血者。天以告也。地坼者。地以告也。當闕而哭者。人以告也。而王不戒焉。何得無誅。遂擢王。脰懸之廟梁。宿昔而死。

論曰。齊自伐燕之亂。五旬而舉者。至是殆三十年矣。

至滑之驕殘。燕一舉而墟其國。天道好還。詎不信耶。
迨一傳而至建。松柏興歌。其國遂滅。然則強弱盈虛。
更迭爲之矣。

白起坑卒

白起善用兵，爲秦昭王將，封武安君。攻趙長平，報上黨之怨也。趙受反間，以趙括代廉頗將，屢戰不利。秦遮絕趙糧道，降趙卒四十萬人，起恐爲亂，挾詐而盡。坑之於長平，血流成川，沸聲若雷。前後斬首虜無計。趙割地以和。明年秦復攻趙邯鄲，遣起不果行。秦王怒，賜起劍自殺。歿之日，引劍將自剄，曰：我何罪於天而至此哉！良久曰：我固當歿矣。長平坑趙卒降者數十萬人，是足以歿，遂自殺。

論曰、誅降殺順、大不義也。弱鳥投人、猶爲依依。一日而坑四十萬、爲造物何。至引天自咎曰、是足以歎。然而亦已晚矣。

商鞅作法自弊

商鞅衛之諸庶孽公子也。好刑名之學。事魏爲中庶子。魏不用。西游秦。因孝公。寵臣景監求見。說以疆國變法之令。變刑尚功。逆民反古。令旣具。立木於南門。予徙者五十金。以示信。民之言不便者以千數。太子犯法。黥其師公孫賈。刑其傅公子虔。又劓之。民始趨令。爲大築冀闕。宮廷於咸陽。自雍徙都。令民父子兄弟同室相禁。用連坐告姦之法。有弃灰偶語腹誹之刑。決獄涓水盡赤。赭衣滿道。民無完膚。雖日富強而

民不堪命。行之數年。鞅伐魏。欺虜公子卬。盡破其軍。
魏獻河西之地。秦封鞅爲商君。商君相秦十年。季公
卒。太子秦惠王立。發吏捕商君。商君亡至關下。欲舍
客舍。舍主曰。商君法嚴。舍人無驗者坐之。因不納商
君。曰。嗟乎。爲法之弊。一至此哉。因走魏。魏弗受。曰。商
君秦之賊。弗歸不可。遂內之秦。惠王車裂商君於市。
滅其家。

論曰。先王知人情之不可以法治也。養老恤孤。尊德
序禮。而民猶不返古。至於刑罰。羈縻之而已。嘗按商

君開郡縣阡陌。後世亦有便之者。但陰狠峭淡。操之太急。是欲以秋冬之氣治天下者。求陽和得乎。故作。法。自。裂。而。秦。亦。以。亡。天。下。詩。曰。得。人。者。興。失。人。者。崩。怨。毒。之。於。人。甚。矣。哉。

晉司馬氏自剪宗親。

晉武帝司馬炎篡魏自立。因懲魏孤立之敝。欲大封宗室。以自強。故兄弟皆封王。假節授以大郡。得督中外軍事。國中長吏皆許自選。及武帝崩。傳位惠帝。趙王倫以平賈后之亂。自爲相國。加九錫。殺淮南王允。及諸大臣。永寧元年。遷帝於金墉。殺太孫。滅倫。自稱皇帝。齊王冏。成都王穎。河間王顒等。迎帝還宮。收倫及其子。皆賜死。凡內外殺十萬餘人。

齊王冏以平趙王倫之亂。自爲大司馬。輔政。加九錫。

與潁頤相圖。驕奢宴樂，不入朝省，坐拜百官，嬖寵用事，外中失望。河間王頤聽長史李含之謀，表陳阿罪，請徵長沙王又討阿，以成都王潁輔政。遂使張方舉兵趨洛陽，又入宮奉天子，攻阿，斬之。是日大戰，矢集御前，羣臣歿者相枕。

初，河間王頤以李含謀欲齊王阿，殺長沙王又而後討之。廢帝立潁，因乘便圖潁自立。不虞又遂誅阿，不如所謀。因嫌又居內有功，不得逞其欲。潁與潁遂表又爭功，擅政，請遣又還國。乃以張方、陸機爲都督，將

兵二十餘萬向洛陽。帝軍入芒山。張方入京城大掠。處者萬計。東海王越收义使張方炙殺之。頴入京。自爲丞相尋還鄴。

司馬頴表頴爲皇太弟。自爲太宰。頴僭侈日甚。東海王越奉帝征頴。徵召四方兵十餘萬。東安王司馬繇勸頴出迎請罪。頴不從。遣石超拒戰。乘輿敗績。帝頴中三矢。侍中稽紹歿之。頴執帝入鄴。改元。殺東安王繇。及幽并兵至。奉帝御犢車還洛陽。倉卒南奔。至於貧黃門錢三千爲帝道中買飯。帝褰履納從者之履。

窘蹙無策，遂爲張方所劫，遷帝於長安。後宮府藏爲軍掠盡。太宰顓頊以越爲太傅。惠帝光熙元年，顓頊據洛陽，復謀叛，爲長史劉與所誅。

初，顓頊與張方劫帝，司馬越傳檄討張方，使人說太宰顓頊，令奉帝還洛，約與分陝爲霸。顓頊不從，及顓殺張方，送首於越，以請和。越不許，遣將祁弘帥師攻之。顓逃入太白山，帝遂東還。內外皆服於越，越自爲太傅、錄尚書事。帝中毒崩。越召顓未至，爲南陽王模所殺。後永嘉五年，劉曜寇長安，模出降，亦爲曜所殺。

司馬越以討張方之亂奉帝東還政由已出惠帝既崩懷帝永嘉元年二月越殺故太子清河王顒及忠書令繆播帝舅王延等數十人使將軍何倫領東海國兵數百人入宿衛倫因抄掠公卿逼辱公主帝亦惡越專權密詔苟晞討之越遂憂歿以喪還葬東海石勒帥輕騎追之戮其屍曰亂天下者此人也吾爲天下報之世子毘及宗室四十八王皆没于勒漢遂陷洛陽劉曜王彌石勒皆引兵入宮大掠殺太子詮等廢掘諸陵焚宮廟府寺貴臣宗室歿者數萬人劉

曜自納羊后。遷帝及六璽於平陽。晉室遂微。
論曰。百足之蟲。至死不僵。以其扶之者衆也。束箭難
折。孤掌不鳴。王者有親親之經。所以爲盤根固本計
耳。典午氏以偏反。交兵引虎入室。卒至天下土崩。亦
各不得其死。作法可不善乎。

晉景公膏肓入疾

左傳魯成公八年晉殺其大夫趙同趙括晉侯夢大厲披髮及地搏膺而踊曰殺余孫不義余得請於帝矣壞大門及寢門而入公懼入於室又壞戶公覺召桑田巫巫言如夢公曰何如巫曰不食新矣公疾病求醫於秦秦伯使醫緩治之未至公夢疾爲二豎子曰彼良醫也懼傷我焉逃之其一曰居盲之上膏之下若我何醫至曰疾不可爲也在盲之上膏之下攻之不可達之不及藥不至焉不可爲也公曰良醫也

厚而歸之。六月丙午，晉侯欲麥，使甸人獻麥，饋人爲之。召桑田巫示而殺之。將食，張如廁，陷而卒。

論曰：宿寃之報，古有然矣。或曰：鬼果有知者。或曰：心氣之所召者，吾嘗見人有虧心之行，多致奇疾異祟。至於懸符以辟邪，媒巫以賂鬼，而現世得報焉。然亦有殺人而享長壽者，何耶？豈鬼亦有靈，不靈耶？抑將有所待耶？

吳主嗜殺

三國吳主孫皓每宴羣臣咸令沉醉置黃門郎十人爲司過宴罷之後各奏闕失或剝人面或鑿人眼由是上下離心莫爲盡力晉王濬上疏武帝曰孫皓荒淫凶逆宜速征伐若皓死更立賢王則強敵也願陛下無失事機晉咸寧五年冬十一月大舉兵分道伐吳吳將迎降遂滅吳執皓

論曰皓乘江東三世之資恣其凶暴以狂藥飲人而用罪狀淵桀紂何加焉主青蓋入平朔關雖天運有

終而樓船鐵鎖固皓爲之齟齬也。他日語足折充倭能卒歲後猶稱其才也。不足觀矣。

嚴延年母識天刑。

延年漢宣帝五鳳元年爲河東太守陰鷙酷烈冬月
論屬縣囚流血數里河南號曰屠伯母從東海來見
報囚大驚便止都亭不肯入府因責延年曰幸得備
郡守端治千里不聞仁義教化生全愚民願乘刑罰
立威豈爲民父母意哉天道神明人不可獨殺我不
意當老見壯子刑戮也行矣去汝東歸掃除墓地耳
後歲餘延年以誹謗弃市

論曰有此母乃有此兒天何以報此母乎天道無親

唯與善人。蓋延年之暴。非母所得掩者。故仁人乃能
事親。

李廣終身不侯。

漢李廣功高數奇終不得侯。一日謂術士王朔曰。廣部下皆中人耳。借廣力封侯者數人。廣卒不封。豈相不當侯抑命也。朔曰。將軍自念之。或嘗有所恨乎。廣曰。吾爲隴西守。羌嘗反。誘降八百人。皆同日殺之。至今爲恨。朔曰。禍莫大於殺已降。此將軍所以不侯也。先廣以罪失位。出獵至霸陵。霸陵尉不爲禮。廣銜之。後廣復位爲將軍。以術取尉。置麾下殺之。漢元狩四年。廣同大將軍衛青擊匈奴。失道當斬。亦引刀自刎。

論曰廣善射得士卒歿力稱漢飛將軍報怨殺降。福
量固不弘哉。功高不侯。旣殺身而滅名。至李陵臣虜。
而宗遂滅。天之報廣若或過焉。然而三世爲將。道家
所忌。君子已言之矣。

齊桓公殺弟糾。

左傳。齊襄公。私文姜。殺魯莊公。爲無知所弑。國中亂作。鮑叔牙奉公子小白奔莒。管夷吾召忽率公子糾奔魯。魯侯伐齊。納糾。小白自莒先入。是爲桓公。使鮑叔帥師。取子糾於魯。殺之於生竇。以管夷吾爲相。稱霸焉。公好內。如夫人者六人。長衛姬。生武孟。無虧。少衛姬。生惠公元。鄭姬。生孝公昭。葛嬴。生昭公番。密姬。生懿公商人。宋華子。生公子雍。公與管仲屬孝公於宋。襄公以爲太子。雍至有寵於衛。共姬。因寺人貂以

薦羞於公。亦有寵。公復許之。立武孟。周襄王九年。十月。乙亥。桓公卒。五公子爭立。相攻。宮中空。莫敢棺。尸在床。上六十七日。尸出。於戶。易牙與寺人貂作亂。殺羣吏。而立武孟。至十二月乙亥。乃棺。辛巳夜。崩焉。武孟。二月。卒。宋襄公以諸侯兵納公子昭。是爲季公。季公卒。弟蕃殺季公子。而自立。是爲昭公。昭公卒。弟商人復弒昭公之子。舍而自立。是爲懿公。懿公被弒。齊人乃迎衛姬公子元而立之。齊禍始平。

論曰。甚矣天之禍淫也。淫者。陰氣。陰則殺傷隨之。故

齊襄內行不修身。死而亂。及子孫生。實之殘。天其以報襄乎。至桓以殺弟稱霸。陰孽成疾。種及廢子。一死而內亂如糾之。死者三焉。嗚呼。尸出出戶。床第之流風乎。偏反之遺臭乎。

唐太宗喋血三朝

唐高祖李淵有三子，長曰建成，仲曰世民，季曰元吉。惟世民英武絕世，有帝王度，人皆歸之。高祖起兵關中，皆世民力，故卒成帝業。淵以建成實居長，立爲皇太子，封世民爲秦王，元吉爲齊王。內外征伐，世民實任之，因以平薛仁果、王世充、竇建德、宋金剛、劉武周、劉黑闥等，前後親歷百戰，世民功多焉。元吉素多凶德，建成長而無功，構隙相傾，以危世民。武德九年，建成夜召世民飲而酖之，吐血數升得解，上謂世民曰：

首建大謀。削平海內。皆汝之功。吾欲立汝爲嗣。汝固辭。觀汝兄弟似不相容。吾將遷汝居洛陽。如漢梁孝王故事。將行。建成元吉謀留之。不得往。又散遣秦府驍將以益諸軍。忌尉遲敬德勇。譖於上。將殺之。世民固請得免。以上命逐房玄齡。杜如晦。程知節等。秦府智勇驅遣將盡。相與謀殺世民。益急。是時世民腹心惟長孫無忌。尉遲敬德等數人。勸之。決計。六月四日。世民帥長孫無忌等伏兵玄武門。元吉建成亦皆勒兵入朝。至臨湖殿。世民追射建成。殺之。敬德射殺元

吉上聞。幾曰。不圖今日乃見此事。遂降手勅。內外諸
軍皆受秦王節制。以世民爲皇太子。乃更殺建成。元
吉。諸子十人。帝自稱太上皇。八月。秦王卽位。是爲太
宗。貞觀十六年。太子承乾謀反。魏王泰亦謀相。傾帝
不知所立。因自投於牀。舉刀欲自刺。褚遂良止之。遂
立晉王。而幽諸子於遠州。及高宗朝。武后大殺宗室。
滅太宗子孫殆盡。

論曰。手足而生疔毒。良藥敷之不痊。則潰及腹心。割
落斷肉者。輕重之勢也。太宗不殺兄弟。兄弟必殺太

宗太宗歿而元吉復謀吞併。則宗社亡而民神無主。天下治亂之大關也。鳴梟破斧。何累東山。所以有間然者。誅其身而復夷其後。彼孰非高祖之子孫乎。他日太宗兩子相謀。親見其事。投床拔刃之時。雄心盡矣。蓋猛虎萬物咸伏。而不能不受害於毛間之蟲。力之所不能及也。當時武氏已在後宮。形之讖卜。得非巢刺之禍兆其穢乎。黃臺瓜盡。始於豆筌箕。然此周公蔡仲之封。爲不可及也已。

齊蕭鸞滅宗

南北朝齊蕭鸞既殺諸王，遂弑其主而自立。以兄子遙光爲揚州刺史，立寶卷爲太子。鸞有疾，以近親寡弱，而高武子孫猶有十五人，欲盡除之。遙光力贊，以爲當以次施行。每屏人語畢，鸞遂索香火，嗚咽流涕。明日必大有所誅。遂殺河東王鉉等十人。太宗、世祖及世宗諸子皆盡。鸞殂，寶卷立，臨喪大笑，以羣臣爲戲。與左右刀初殺大臣江祐、江祀、蕭坦之等，常以夜三四更，鼓聲四出，夾光照天，輜載黃路，遇人則立殺。

之。嘗至沈公城。有孕婦臨產。不能避。因剖腹視其男。
女。士民驚震。樵蘇絕路。又好擔幢。戴金薄帽。着織成
袴褶。乘馬驅馳。晝夜不息。大起芳樂。玉壽等殿窮極
綺麗。鑿金爲蓮花。以帖地。令潘妃行其上。曰。此步步
生蓮也。百姓困盡。號泣道路。與潘妃在宮爲市。巫覡
詐云。見先帝大嗔。遂縛菰爲高帝形。跪斬之。懸首苑
門。及梁蕭衍起兵入建康。寶卷以金銀爲鎧。飾以孔
翠。騎馬宮殿。遊戲如常。雕鏤雜物。督工倍急。左右御
刀。法珍等謀爲內應。寶卷方在含德殿調笙歌。遂入

斬之。謚爲東昏侯。誅法珍及潘妃。盡滅齊宗室。而梁代。

論曰。寶卷爲蕭鸞之子。鸞之所以爲卷。慮者悉矣。當其索香火流涕之時。惟恐高武子孫有一之不盡。爲吾後患。而不知爲後患者。非高武子孫也。不過代蕭衍先爲屠滅耳。出爾反爾。胎謀燕翼。夫豈有毫厘之爽哉。

呂后殺戚夫人

呂太后，漢高祖妃也。剛毅有謀，佐高祖定天下，所誅大臣多出后力。生孝惠帝，爲人仁弱。高祖嘗欲廢之而立戚姬子如意，賴留侯不果。高祖崩，后囚戚夫人，酖趙王如意，斷戚姬手足，去眼，燬耳，飲瘖藥，使居廁中。命曰人彘。孝惠感情崩，后稱制，自臨天下，封諸呂爲王、女弟呂嬃爲列侯，以所幸審食其爲丞相，使呂台、呂產、呂祿統南北軍。又以呂女故，殺趙王友。趙王恢三月被還過軹道旁，見物如蒼犬，據后腋中不見。

卜之云趙王如意爲祟遂病斷其腋時見戚夫人若
追索者吕后四體潰裂暴崩諸吕欲作亂用平勃謀
入北軍軍皆左袒朱虛侯劉章誅吕產捕斬吕祿等
而笞殺吕嬖諸吕俱族審食其爲淮南王所殺至後
漢光武時赤眉發掘后陵辱割之而去

論曰吕后雌龍也開國乘運配天而出間氣之在陰
者歟使平勃不驩漢天下其未可知也觀其酖殺如
意糟戚姬則一毒婦人耳戚曰使吕爲鼠吾當爲狸
以報此冤斷腋而死能幾日乎故垂之以爲妬鑑

袁紹一目殺二烈士

漢獻帝興平二年，張超守雍丘，爲曹操所圍。時故吏臧洪、袁紹表爲東郡太守。超曰：「惟臧洪當來救吾。」衆曰：「袁曹方睦，洪爲袁用，必不敗好以抗曹。」超曰：「臧子原，天下義士也，必不背本。」及洪聞難，徒跣號泣，從紹請兵以赴難。紹不與，請率所部以行，亦不許。雍丘遂潰，超自殺。洪由是絕紹不復與通。紹怒，與兵圍東郡，歷年不下。以書諭之，答紹書曰：「僕小人也，中因行役，遂竊大州，自謂究竟大事，共尊王室，豈意本州被侵。」

郡將遘危。請師見拒。辭行被拘。使洪故君遂至淪沒。區區微節。無由獲伸。此洪所以忍悲揮戈。收淚告絕者也。城中糧盡。將士皆煮筋掘鼠爲食。莫有叛者。男女七八千人。相枕而死。城陷被執。紹殺之。時洪邑人陳容素爲洪友。謂紹曰。將軍舉大事。而先誅忠義。豈合天意。紹慙。使人牽出欲殺。容曰。仁義豈有常。暗之則君子。背之則小人。今寧與臧洪同日而死。不與將軍同日而生者也。遂并被害。左右皆竊嘆曰。如何一日殺二烈士。後袁紹卒爲曹敗。殺其二子。譚尚遂滅。

論曰。人之云亡。邦家殄悴。善人國之寶也。臧洪不肯
故吏之恩。臨難仗義。可謂壯士。紹不知收而用之。執
而肆戮。并及其友。尚能得士心乎。後曹操得漢壽亭
侯。厚禮而不降。卒縱之歸漢。曰。此義士也。夫操之霸
業終成。紹之宗族以滅。得失之所由分也。

劉琨妄殺諫士

晉劉琨有志晉室。在并州。歸附甚衆。怒護軍令狐盛切諫。殺之。琨母曰。汝不能駕御豪傑。以恢遠畧。而專惡人勝已。其敗必矣。盛子泥奔漢。具言虛實。爲鄉導。引劉粲劉曜寇并州。琨收兵於常山。不能救。父母皆被害。琨亦爲段末柁所殺。天下惜之。

論曰。劉琨處晉室式微之日。而能鳴劍從王。舞衣奮義。雖事功不成。志氣過人遠矣。惜其量盈器滿。中懷豁刻。殘殺善人。奄然憔悴。又安怪聞難之業不終。昔

公孫瓚之殺劉虞。袁本初之殺田豐。皆以忌勝掩功。
任情肆虐。而成業淪亡。身歿人手。歷觀覆敗之君。鮮
不同轍。哀哉。

宋子業淫暴無道

宋主子業。狂暴好殺。誅戮大臣。柳元景。顏師伯。沈慶之等。與姊山陰公主。每出同輦。納其姑新蔡公主。謂之謝貴嬪。山陰淫恣尤甚。子業爲置面首。左右三十人。幽諸父。法東王彧等於殿內。爲猪王。驢王。殺王之號。以木槽盛食。裸內泥水中。歐捶陵曳。無復人理。常欲殺而釋之。嘗召諸王妃主於前。強左右使通辱。南平王鐸妃江氏不從。怒鞭一百。而殺其三子。使宮女裸逐於華林園。一女不從。業斬之。夜夢其女曰。我已

訴上帝。悖虐不道。明年不及熟矣。於是與羣巫射鬼於竹林堂。左右抽刀弑之。公主皆賜歿。

論曰。子業奇惡。蓋有貽謀焉。當孝武誅凶。劬而入立。不能撫國。疚心乃沉。湎喪志。淫亂宗女。使骨肉狼藉。誅歿相繼。蓋天醜其行。而生業以報之耶。亦氣之所感也。劉裕以好殺開國。孫子相承。八世而六主被弑。貽厥孫謀。寧無報乎。

宋明帝自滅其宗

宋明帝，湘東王彧也。以子業無道被弑而立之。晉安王子勛自以居世祖之穆，卽位改元。諸州皆應。宋主討平之，遂疑兄弟于多，恐不利已，於是殺其兄子安陸王綏等十三人。世祖二十八子皆盡。乃宋主竟無子。嘗以官人陳氏賜嬖人李道兒，迎還生昱，立爲太子。及昱立，自以爲李道兒之子，着小袴衫，夜宿客店。晝臥道傍，微行巷陌，稱李將軍，性酷好殺，一日不殺，則慘然不樂。每出則從者皆執鋌矛鋸鑿，逢無免者。

民間擾懼。路無行人。嘗自詣中領軍蕭道成第。畫腹
爲的。射之。幾死。與左右登臺岡賭跳。偷狗飲酒。道成
令校尉王敬則弑之。遂滅宋國號。齊宋之宗室無少
長皆殺之。

論曰。剪枝傷根。借流續源。乃生狗彘。毒氣鍾焉。時當
傍閏。天地陰殘。故豺冕而猴冠。

石虎滅三十八孫

趙石勒稱皇帝、立世子弘爲太子、以石虎爲太尉、虎恨之、及勒卒、太子弘立、虎自爲丞相、加九錫、殺弘而自立、作太武殿於襄國、東西宮於鄴、皆釐以文石、以漆灌瓦、金璫銀楹、珠簾玉壁、選士民之女以實之、服珠玉、被綺縠者萬餘人、皆教以騎射、着紫綸巾、熟錦袴、鼓吹遊宴、又徙洛陽鐘簴、九龍、翁仲、銅駝、飛廉於鄴、功費數千萬億、悉發前代陵墓、取其珍寶、惑沙門、建宮、以爲胡運將衰、晉當復興、當苦役晉人以厭其

氣虎遂發近郡男女十六萬人。車十萬乘。運土築華林園。燃燭夜作。暴風大雨。死者相枕。命皇太子宣祈福於山川。因大遊獵。宣乘大輅。羽葆華蓋。建天子旌旗。戎卒十八萬。出自金明門。虎登凌霄觀望之。笑曰。我家父子如是。非天崩地陷。當復何愁。宣縱獵所過。三州十五郡無孑遺。士卒死者萬餘人。虎復命少子秦公韜率兵出并雍。與宣兢爲雄長。宣忌韜。使人刺殺之。虎聞變。哀驚幾絕。因殺宣及其妻子。窮極慘酷。揚灰於市。遂立子世爲太子。及虎卒。太子世立。其兄

遵殺世而自立。以石閔爲都督中外軍事。是時鄴中
暴風拔樹。震雷雨雹。大如升盂。太武殿災。火月餘。乃
滅。石閔復殺遵。而滅石虎孫三十八人。帥趙人誅胡
羯三十萬。無少長皆坑之。遂滅石氏。改國號魏。

考之綱目。石氏縱暴強兵。五胡最狡。當其登臺觀。二
子耀兵之時。豈知轉眼骨肉自相屠割。天地固未嘗
戲陷也。天道好還。雖夷狄亦不爽。慘毒殺人。亦何益
哉。

竇憲毒殺朝臣

後漢章帝元年立貴人竇氏爲后后兄憲爲侍中司
宣詔命弟景篤璜皆在尊要帝崩太子肇卽位太后
臨朝憲忌都鄉侯暢遣客刺之於屯衛之中事發不
誅以憲爲車騎將軍使征匈奴進位大將軍居三公
上兄弟驕恣奪人財貨婦女不可紀尚書僕射樂恢
上疏言之憲迫恢飲藥死由是朝臣震懼無敢言者
竇氏父子兄弟并爲卿校充滿朝廷將謀畔逆和帝
四年帝命鈞盾令鄭衆同清河王慶勒兵誅憲兄弟

卷之三
黨與皆弃市。

論曰。憲以椒房之親。立功域外。不能如衛青養尊處
晦。而行殺掠之虐。器滿則盈。日中則仄。君子知其不
終矣。范曄惜其末釁。不章厥績。殆未能知天平。

路巖剔結喉三寸

唐懿宗咸通六年。以路巖同平章事。巖自淮南幕府入爲御史。不出長安。十年至宰相。其爲相也。密奏三品以上賜歿者。皆令使臣剔其結喉三寸以進。驗其必歿。初與楊收同平章事。巖以賄殺收。及僖宗乾符元年。詔賜巖歿。亦取結喉以獻。所歿之處。卽楊收之榻。人咸咤爲奇應。

論曰。人之結喉。剔之。斬之。爾之結喉出之。反之。爾剔爾斬。爾出。爾反。三寸之間。天道不遠。

高綽慘惡

齊南陽王高綽喜爲殘虐嘗見一婦人抱兒取以飼狗復以兒血塗婦人縱狗食之齊主緯聞之鎖詣行在至而宥之問在州何事最樂對曰聚蝎於盆使狙其中齊主即命索蝎置浴斛使人裸臥其中號叫宛轉觀之喜噓不已因讓之曰如此樂事何不馳驛奏聞由是有寵韓長鸞奏其謀反遂殺綽齊亦爲周所滅殺緯而夷其族

論曰天閨未朔羣陰用事高齊皆以夷虜之性妄僭

孟子卷之五
三十五
生乎芻狗生民恣其虐食或天亦不仁乎蜂蟄不能
不生毒螫自殘終歸夷滅蓋有以需之也

閩主信鬼殺叔

五代閩主王昶寵巫信鬼素忌其叔延武延望巫者林興與之有怨託鬼神語云二人將爲變昶遂殺之并其五子又於禁中作三清殿以黃金數千斤鑄老君像呼爲寶皇晝夜作樂焚香禱祝政無大小皆使林興傳寶皇命決之由是中外大亂踰月三清殿災火延北宮數千間控鶴軍李重遇等攻殺昶而立其叔延義昶妻子皆歿。

論曰自剪厥宗以快人譖我有寶皇禍福是問寶皇

不言。壬人之讒。官燼身亡。天道好還。

閩王曦戲虐

五代閩王曦淫暴好殺者舊宗族多不自保立尚氏
爲賢妃醉中誅殺任意嘗與翰林學士周維岳飲曦
曰維岳身小而飲多何也左右曰酒有別腸曦欣然
命捽維岳下殿剖腸視之以苦諫得免每醉必殺數
人百官爲之股栗指揮使朱文進弑之而自立并殺
王氏宗族五十人

論曰咄嗟哉爾欲剖人之腸而自不免者何哉晉漢
怪士君子甘立此鴟梟之前也

四其御史

唐則天中郭弘霸舒州同安人仕爲寧陵丞天授中由革命舉得召見自陳往討徐敬業臣誓抽其筋食其肉飲其血絕其髓武后大悅授左臺監察御史再遷右臺侍御史大夫魏元忠病僚屬省候弘霸獨後入憂見顏間請視便液即染指嘗驗輕重賀曰甘者病不瘳今味苦當愈喜甚元忠惡其媚暴語于朝嘗按芳州刺史李思微不勝楚毒死後屢見思微爲厲命家人禳解俄見思微從數十騎至曰汝枉陷我今

取汝弘。霸懼。援刀自剗腹。歿。頃而蛆腐。是時大旱。弘霸歿而雨。又洛陽橋久壞。至是成都人喜。后問羣臣。外有佳事邪。司勳郎中張元一曰。比有三慶。旱而雨。洛橋成。弘霸歿。

論曰。吾讀武后紀。多用酷吏以威下。至以獬豸不學而觸奸之一言。奴隸皆授侍御。蓋以鷹犬畜之。使搏擊大臣。安得弘霸不爲四。其平嘗糞媚人。乃其本色。蓋媚人者。乃能殺人。剗腹見厲。勿謂寬之無報也。

白兔御史

唐則天中王弘義冀州衡水人以飛變擢游擊將軍再遷左臺侍御史與來俊臣兢慘刻暑月繫囚別爲狹室積蒿施糞廁其上俄而歿已自誣乃舍他獄每移檄州縣所至震懼弘義輒詫曰我文檄如狼毒野葛矣始賤時求傍舍瓜不與乃騰文言園有白兔縣爲集衆捕逐畦畝無遺內史李昭德曰昔聞蒼鷹獄吏今見白兔御史延載初俊臣貶弘義亦流愛州自矯詔追還事覺賜歿

論曰。維。兇。成。之。維。兇。終。之。嗟。彼。狡。兮。維。天。烹。之。爰。爰。
爾。微。維。爾。之。巧。炎。炎。冰。山。維。爾。之。倒。

酷吏多自殺

張湯。事漢武帝。爲廷尉。見時作磔鼠文。如老獄吏。天性文淡。意思舞智。峭狠。時武帝好刑名。湯揣摩鉤索。用深刻吏爲爪牙。巧排大臣。動連黨與。帝稱以爲能。由是天下騷動。所誅連以千百數。後以奸事爲三長史所奏。武帝疑湯懷詐面欺。使自殺。

義縱者。河東人。素爲羣盜。以姊幸於王太后。拜縱中郎。復遷長安令。行法不避貴戚。吏民重足。呼爲乳虎。掩定襄獄。一日殺四百餘人。郡中不寒而栗。武帝幸

甘泉以道不治遂弃市。

王溫舒陽陵人也。少時椎埋爲奸。已而補吏以治獄。至廷史。事張湯。多殺人。遷爲御史大夫。能使罪人鉤索人私事。以自贖。無不快意者。遷爲河南守。先具私馬五十匹。爲驛。自河南至長安。皆部吏捕郡豪猾連坐千餘家。上書請大者族。小者死。不過三日皆報可。流血十餘里。人疑其神速。郡中白晝無聲。犬不夜吠。會春。天子停刑。溫舒頓足曰。嗟乎。令冬月益展一月。足吾事矣。好殺類如此。後有人告其姦利事。遂自殺。

夷其族。仇人燒其尸而不得葬。時兩弟及兩婚家亦坐他罪而族。人快之曰溫舒。一日滅五族。

論曰。余讀酷吏傳。武帝好刑。其時吏治多放溫舒。如杜周。郅都。寧成等。皆以酷烈有聲。歲終會獄。府郡及廷尉詔逮。至十萬餘人。虻蟻極矣。而酷吏卒皆以殺身。民亦愈輕犯法。盜賊滋起。漢由此衰焉。然則刑何足恃哉。虞廷五人。惟隄無後。秋氣之報亦明矣。

周興入竈

唐中宗嗣聖三年，武后自以久專國政，纂唐爲周，欲誅戮大臣以威之。乃大開告密，周興來俊臣等皆以殘忍寵用。周興累遷至秋官侍郎，俊臣至御史大夫，皆養無賴數百人，網羅無辜，織成反狀，每一獄必引陷千百家。其問刑酷法，各有異號，如笞地吼、歛猪愁之類，淫刑異吊，甚於炮烙。嗣聖七年，金吾大將軍丘神勣以罪誅，或告周興與勣通謀。太后密令俊臣鞠之，俊臣方與興推獄畢，對食。紹興曰：「囚多不承，何法？」

最快興曰甚易耳。取大瓮以炭圍炙之。令囚入其中。何事不承。俊臣即取大瓮如興所教。起謂興曰。有內狀。推兄請兄入此瓮。興惶急輸服。請死。流嶺南爲仇家殺於路。來俊臣亦爲太后所殺。仇家爭食其肉。士民相賀。

論曰。雷殛電擊。天怒亦不終朝。惟陽春可與悠久焉。武后以陽衰伏匿。陰淫爲帝。狐張狼嗥。白日無光。此亦古今一大變也。卒之二賊自嚙骨糜肉爛。瓮中之天。君獨不及醢雞乎。

黃潛善妄殺陳東

徽宗宣和七年，金人入寇，帝詔天下直言。時蔡京等畏國，人皆知而莫敢言。太學生陳東率諸生上疏曰：「今日之事，蔡京壞亂於前，梁師成陰賊於內，李彥結怨於西北，朱勔聚怨於東南，王黼童貫結仇於二虜，伏願陛下擒此六賊，肆諸市朝，傳首四方，以謝天下。」雖帝不能用，聞者快之。及金人虜二帝北去，高宗即位於南京，改元建炎，以黃潛善爲尚書左右僕射，嫉害忠良，力主和議，逐李綱，沮宗澤，而帝不悟。東又上

疏請帝親征。以還二帝。留綱而罷潛善。不報。潛善等以語激帝。逮東廷尉。東知不免。從容就義。天下哀之。建炎三年。貶潛善於江寧。得暴疾。自言見陳東而歎。論曰。陳東危言於亂朝。以成仁取義。志士不忘之。素心也。歿之日。終能殛姦魂。以報憤。東固不歿哉。故盡性則可以知命。朝聞夕歿。非東之謂乎。

魏拓跋三后償冤

魏拓跋恪正始四年，高貴嬪寵冠後宮，悍忌尤甚。兄司徒高肇，執傾中外，相爲羽翼，酖殺魏后于氏及太子昌，立高嬪爲后。肇益貴重，譖殺彭城王勰，變更政令，朝野側目。進位大都督，以步騎十五萬伐梁。延昌四年，恪卒。太子翊立，肇與侍中王顯謀亂，伏誅。立翊母胡氏爲太后，稱制。神龜元年，以天文有變，酖高后以厭，亦如于后之。次，胡后好佛，喜遊，有淫行。侍中元叉幽之於北宮，后復謀出殺叉，弑翊而立幼子釗。及

爾朱榮之亂。遂沉胡后於河。

論曰。寵嬖之禍。由來尚矣。類皆擯衆前身。爭榮市色也。夫時過則貌或通之。勢盛則地將移之。威衆則忌或禁之。情極則欲將間之。是固天道周復。而人欲所必循也。以茲嫡庶工讒。戚孽據位。內無却席之諫。外有怙軒之寵。遂使綠衣貽譏。黃臺蔓禍。斷鼻輝耳。極其慘毒。豈不哀哉。吾觀三后。美鳩相償。愛河共溺。存之以代鵬羹焉。

朱粲噉人

唐武德初，朱粲剽掠江淮，有衆二十萬。軍中乏食，則命士卒烹婦人嬰兒食之，曰：「肉之美者，無過於人。」但使他國有人，爾輩何憂於餒哉？初，以隋著作郎陸從典、通事舍人顏慆楚爲賓客，其後闔家皆爲噉。又稅諸城堡，細弱以供軍食。淮安土豪楊士林起兵攻破之，奔菊潭，遂降唐，以爲楚王。遣散騎常侍段確奉詔慰之。確乘醉戲粲曰：「聞卿好噉人，人作何味？」粲怒曰：「噉醉人，正如糟醢肉，促令烹確。」遂屠菊潭。奔王世充。

及東都敗。秦王執絜。斬之。軍士分食其肉。

論曰。始作俑者。其無後乎。爲其象人而用之也。率獸食人。猶以爲慘。乃同類而相啗。不亦異乎。雖然。絜之食人。滿腹而飽也。終以身償也。若夫弱肉強吞。伏弩推刃。其爲噉也多矣。蓋絜噉人之血肉。又有噉人之骨髓而甘心者焉。嗚呼。人之相噉。何時已乎。恐不能逃天之噉耳。

契丹帝紀

五代石晉爲契丹耶律德光所滅。屠陷城邑。殺掠不可勝計。每克一城。悉阬其男子。驅婦女牛馬而北。嬰孺無遺者。燬牖十餘萬。築爲京觀。天福十二年。德光至殺胡林而歿。其國人剖腹實之以鹽。載於馬上。北去。晉人謂之帝羆。亦屠城之快報云。

論曰。契丹不足以入吾史也。虎狼而食人。何可言報。而稱快者。必寢以猛獸之皮。曰。亦以見天道所不遺。

宋易元祚

宋少帝昺爲元虜時方四歲封瀛國公及元世祖時帝漸長相習無忌得配公主嘗與內宴後有譖欲殺之者世祖疑未果少帝聞之懼密謀乞爲僧往吐蕃學佛法因繫后公主姬御遁居沙漠射獵與元人無異髡剃長子爲僧名完普復生一子異常時元明宗爲周王亦居沙漠與少帝公主往來甚洽見少帝幼子愛之乞與其妻適來的爲子更名懽帖木兒即元順帝也後明宗嗣位崩順帝立遂失元天下與我

太祖時元后大臣俱被俘戮與南宋相類惟順帝之子愛猷識理達臘率數騎渡鴨綠江逃去蓋宋子孫云。